

BLACK DEATH

AHMED ABDEL HAMID

قصة
قصيرة

الموت الأسود

أحمد عبد الحميد



الموت الأسود

أحمد عبد الحميد

تنويه

هذه النسخة التي بين ايديكم هي نسخة إلكترونية مجانية ولا يجوز قص أو تغيير أو إعادة نشرها أو الترخيص منها دون إذن كتابي مسبق من المؤلف شخصيا

الحلم

الأحد 19 نوفمبر

الساعة 10 صباحا

بعد أن طرق على الباب عدة طرقات خفيفة دخل إلى مكتب رئيس الأمن الموجود في المطار الدولي وقدم كارت ابيض للضابط المسؤول وهو يقول :

- أنا الدكتور "يوسف زياد"

رحب به الضابط المسؤول وهو يشير إليه بالجلوس ثم أمر الساعي عبر الهاتف أن يحضر كوبا من العصير ثم نظر إلى الطبيب وقال :

- أحنيا دكتور "يوسف" مش دايما بنقابل حالات زي الحالة اللي شوفناها وحصلت النهاردة

قال الطبيب "يوسف" بعد أن وضع حقيبته الجلدية الفاخرة على المنضدة الصغيرة :

- أقدر أعرف هو ايه اللي حصل بالضبط ؟

- من حوالي ثلاث ساعات كده يا دكتور "يوسف" كانت في

رحلة برقم 752 متجه الى ألمانيا وقبل ما الطائرة تتحرك
بخمسة دقائق فجأة في شخص قعد يتنطط ويصرخ ويقول
إنه شاف كلان غريب موجود في الطائرة وهيكون سبب في
وقوع الطائرة وطلب أنه ينزل منها.

قال الدكتور يوسف وهو يخرج كرامته الصغيرة من حقيبتة :
- كلان غريب ازاي ؟ عفريت مثلا ؟

أخرج الضابط علبة سجاره وعرض على "يوسف" سيجارة
فرفض يوسف في ود فاشعل الضابط سيجارته واكمل حديثه
وقال :

- هو محدش بالضبط ايه نوع الكلان ده .. هو كان في حالة
عصبية شديدة وكان بيصرخ

قال "يوسف" وهو يخرج قلما من جيب سترته :

- ممكن تكون هلاوس أو تخيلات شافها

- ده اللي حاولت المضيعة عمله معاه وتقولوله وأن مفيش
حاجة في الطائرة لكنه أصر ينزل منها .. أحنا بنقابل أحيانا
حالات بتكون أول رحلة طيران ليهم وبيكولوا خايفين جدا
وساعات بيخلقوا أمور علشان ينزلوا من الطائرة زي مثلا أنه
يدعي أنه مريض أو أن في خدمات عنده من قرايبه لكن

بذكاء المضيفات بيقدروا يعرفوا يسيطروا على الموقف
كويس اوي وكمان بيميزوا ما بين الصادق والشخص اللي
اضطر يكذب علشان خايف من الطيران.

قال الطبيب "يوسف" بعد أن رشف رشفة من كوب العصير:
- فكرة أن طيارة تقع من وهي طيارة في السما وتنفجر على
الأرض أو تقع في البحر فكرة مؤلمة في حد ذاتها فما بالك لو
أن الفكرة دي جت في دماغ شخص مضطرب عصبيا
قال الضابط :

- أي إنسان في الدنيا بيتمنى يموت موته طبيعية ، فكرة
الموت محروق أو أن جثتك تبقى أشلاء أو غرقان هي فكرة
في حد ذاتها مرعبة
- قال الطبيب :

- فعلا يا حضرة الضابط .. طيب أنا ممكن أقابل الحالة دي ؟
قال له الضابط المسؤول وهو يتسم له ابتسامة لطيفة :
- أكيد طبعا يا دكتور وهو ده السبب الرئيسي أن حضرتك
تشرقنا هنا .. هو في العادة إحنا بنعمل محضر بالواقعة
وبيخرج بضمن محل الإقامة لأن هو مسببش أي شغب أو

ضرر لكن مع إصراره ومع التفاصيل التي حكاها لي خلالي
استدعي حضرتك علشان اعرف أقيم حالته كويس قبل ما
اتخذ أي إجراء قانوني لأن مساله الحبس وعرضه على النيابة
هتكون له بهدله كبيره وأنا مش بحب أبهدل حد على الفاضي
بخلي دايمًا الانسلايه جزء من واجبي

ثم أمسك بالهاتف وقال :

- هاتلي الامتاز اللي كان عامل مشكلة في الطائرة

بعد قليل دخل شخص وهو يبدو على ملامحه الإرهاق
والتوتر الشديد ، فنظر له الضابط المسؤول وقال وهو يشير
بيديه على الكرسي الموضوع أمام الطبيب :

- لتفضل اقعد يا استاذ وليد ، الدكتور يوسف عاوز يسمع منك
إيه اللي حصل معاك في الطائرة واللى شوفته وعاوزك تطمن
هو هنا علشان يساعدك فياريت حضرتك تتعاون معاه

ثم نظر إلى الطبيب وقال :

- أنا هخرج يا دكتور يوسف وهسيب حضرتك مع الاستاذ
وليد علشان تعرفوا تدرشوا براحتكم

خرج الضابط من الغرفة ونظر الطبيب إلى "وليد" الذي ظل
واقفاً أمامه يمسح بعينه أرجاء المكتب الخشبي في إرهاق

وقال :

- اتفضل يا استاذ وليد اقعد ليه حضرتك واقف ؟

نظر إليه وليد للحظات قليلة ثم جلس في هدوء وهو يقول :

- اكيد افكرتوا اني مجنون ، صح ؟

**ابتسم يوسف ثم مد يده وأخرج علبة سجائر من حقيبته ثم
أخرج سيجارة وقدمها إلى وليد وقال في تساؤل :**

- تدخن سيجارة ؟

**فأخذها وليد ثم اشعل له الطبيب سيجارته بالقداحة ثم وضع
علبة السجائر مرة أخرى في حقيبته ، فقال "وليد" بتهكم وهو
ينظر بعينه المرهقتين في عيون يوسف :**

- معاك علبة سجائر مع انك مبتدخنش يا دكتور

فنظر له يوسف في تساؤل وقال :

- وعرفت بقى منين اني مش بدخن ؟

**قال وليد وهو ينظر إلى ممحاة السجائر الزجاجية الموضوعة
على المكتب الخشبي :**

**- لأن طفاية السجائر مفيهاش غير غقب سيجارة واحدة
واكيد دي بتاعت الظابط مع أنه شره في التدخين تخيل اني**

لما قعدت معاه شرب خمس سجائر في عشر دقائق بس
واكيد حضرتك لما جيت وقعدت معاه عزم عليك بسجائر
واكيد حضرتك رفضت فذوقيا منه مرضاها يشرب سجائر
كثير علشان ميضايقش حضرتك

ثم نظر إلى أرجاء الغرفة واستكمل قللا :

- غير كده انا مش شايف دخان كثير أو ريحة سجائر باينه
في المكتب وده استحاله يحصل في مكتب ضابط يشرب
خمس سجائر في عشر دقائق

ابتسم "يوسف" وقال :

- خرينا نقول إن كل اللي قولته بيدل على أن حس فرامه
عندك ممتاز وألك شخصية لماحه ، بس خريني اقولك برضه
أن تحليلك مكنش صحيح بنسبة 100% لأن بمنتهى البساطة
انا بدخن سجائر فعلا بس بمواعيد محددة

ابتسم وليد بجانب فمه وقال :

- زي ما كان بيعمل لجيب محفوظ ؟

هز يوسف رأسه متفقا مع وليد وقال وهو يبتسم وقال :

- مضبوط يا استاذ وليد

ثم أمسك بقلمه وفتح كراسه الصغيرة وقال :

- ها بقى يا استاذ وليد .. ممكن تحكيلى ايه اللى حصل ؟

- انا حكيت حكايتي الف مرة لحد دلوقتي

- وفيها ايه لما تحكيهاالي تاني ؟ أدينا بندردش

قال وليد في تذمر :

- بس أنا مش مجنون يا دكتور انا متأكد من كل اللى حصل
ومتأكد من كل اللى شوفته

ابتسم يوسف وقال :

- ناس كثير متخيلة أن الطبيب النفسي بيتعامل بس مع
المجانين لكن صدقنى مش شرط تكون مجنون ممكن يكون
كل اللى عندك هو ضغط عصبي

صمت "وليد" لبرهة وهو في حيرة من أمره ، فقال له يوسف
في ود :

- طيب ايه رايك نتعرف على بعض الاول ؟

- يعني حضرتك تقصد عندي كام سنة واسمي ايه وكده ؟

- مضبوط

تنهد وليد وهو ينظر إلى أعلى الغرفة وقد أدرك أنه لا مفر من الحديث مع الطبيب فهو أصبح أمام الناس مجنوناً ، ثم نظر إليه وقال :

- أنا يا دكتور اسمي وليد سليمان البشبيشي عندي ٣٦ سنة وبشتغل مهندس أرمل ومعيدش اطفال
دون الطبيب ما قاله في كرامته الصغيرة ، ثم قال :

- زوجة حضرتك متوفيه قريب ؟

- متوفيه من حوالي خمس سنين

دون الطبيب ما قاله في كرامته الصغيرة فقال له وليد :

- آلت كده شخصتني وعرفت حالتي ؟

ضحك يوسف وقال :

- لا ، بس تقدر تحكي لي من الاول ايه اللي حصل

اخذ وليد نفساً عميقاً وهو ينظر إلى سقف الغرفة كأنه يحاول أن يرتب كلامه ويستعيد أتران عقله وهدوءه ثم نظر في عيون يوسف وقال :

- هو ممكن حد يحلم بموته ؟

- مش فاهم قصداك

- أنا حطمت بموتي

- ازاي ؟

- الحكاية كلها ابتدت من أمبارح رجعت من الشركة اللى أنا
بشتغل فيها بعد ما اخدت اجازتي السنوية وكنت مقرر اني
أسافر ألمانيا سياحة في الإجازة دي ، وبعد ما دخلت بيتي
أكلت لقمة بسيطة وجهزت شنطتي وقررت اني أنام هوية
قبل ميعاد السفر علشان اكون فايق وخصوصا اني ساكن في
محافظة بعيدة عن المطار

دون يوسف ما قاله وليد في كرامته الصغيرة ثم قال :

- وبعدين ؟

قال وليد وهو يتذكر الأحداث :

- بعد ما لمت حطمت اني راكب قطر وتحت رجلي شنطة
السفر بتاعتي كاني مسافر وبعدها جت ست عجوزة وقعدت
جمني وفضلت تعيط وتبكي جامد جدا .. وشها مكنش باين
في الحلم .. وأنا مقدرتش استحمل بكائها الشديد فقررت اني
اقوم من جنبها واروح اقعد في كرسي تلى بعيد عنها لغاية
ما لقيت كرسي فاضي وقعدت وبعد هويه جه راجل عجوز

قعد جمبي وبعدين حضني وقالى وحشتني اوي .

- قال يوسف :

- تعرف الست دي او الراجل ؟

- زي ما قولت لحضرتك الست العجوزه وشها مكنش باين في
الحلم والراجل العجوز معتقدتش الى شوفته قبل كده

- قال يوسف :

- تفاصيل منظمه بالنسبة لحلم بس كل ده ممكن يكون من
تأثير استعدادك لسفرك وعقلك الباطن مستعد وبينبhek ان
عندك سفر ومش عاوزك تروح عليك نومه.

- مش عارف يا دكتور ، بس في الحلم ولانا في القطر الراجل
الى حضني ده اختفى بعد شوية وقعدت ابص عليه يمين
وشمال ، لكن الوضع في القطر كان عادي يعنى ممكن تشوفه
في اي مكان تلى أشخاص قاعدة بيتكلم ، ام بتلاعب ابنها
الصغير ، واحد بيتكلم في المحمول ، واحد تلى بيتكلم مع
مراته ، ام بتزعق لأولادها بسبب شقاوتهم ، صوت شخير لحد
قاعد جنبى ، يعنى عادي جدا.

ثم سكت لبرهه وهو ينظر في الفراغ وبعدها استكمل حديثه

قالا :

- وبعدين وأنا في الحلم وراكب القطر بسرح في تخيالاتي واحلامي وطموحاتي وأنا ببص من شباك القطر وشايف شكل الزرع الأخضر اللي مالي الأراضي الزراعية ، وفجأة الملح في جزء من الثانية شئ غريب بيخرج من الزرع وبعدين بيختفي في لمح البصر وحاولت أقول لنفسي أنه متهيالي..

قال الطبيب :

- آيه هو الشئ الغريب ده يا بشمهندس ؟

- مكنتش عارف وقتها ولا عرفت اهوفه لاني بقولك اني قولت لنفسي أنه متهيالي .. عارف انت إحساس انك تكون بتعمل حاجة في شقتك وفجأة تلمح حاجة صغيرة جرت جنب رجلك وتقعده تقول ده أكيد متهيالي وبعد ما يظهر تلى تكتشف أنه كان فار صغير او صرصار وتعرف أن اول مرة مكش متهيالك ولا حاجة وانا كنت بتحاول تقنع نفسك بكده ؟

ابتسم يوسف وقال :

- أيوة ساعات بيكون كسل منا أو بتكون مشغول في حاجة فتقرر أن اللي حصل ده مجرد تهيؤات

قال وليد نافيا :

- بالعكس يا دكتور ده مش كسل مننا ، ده خوف ... الخوف من ايه اللى هيحصل بعد كده .. الخوف من المستقبل .. لالك لو كنت اهتميت باللى لمحته ده وقعدت تفتش وراه وكركبت الشقة كلها وجبتها من فوقها لتحتها وفي الاخر ملقتش حاجة فوقتها انت مضطر تعمل مجهود اكتر علشان ترتب شقتك تلى وده هياخد من طاقتك اكتر وكمان هتكشف ان خسرت يومك ورا حاجة كانت في النهاية تهيؤات

- قال يوسف متساللا :

- طيب لو اكتشفت بقى ان اللى لمحته ده كان صحيح ؟

قال وليد وهو ينظر في عينيه بنظرات ثابته :

- ده هو الخوف الاكبر .. لان ساعتها هيكون فيها لحظة التحدى .. اللحظة اللى بتقرر فيها ان مينفعش واحد منكم يفضل موجود في الشقة دى واكيد انت مش هتتنازل عن وجودك في شقتك علشان فار او صرصار وهيكون في صراع ما بينكم برضه هياخد من طاقتك ومن مجهودك لحد ما تعرف تتخلص منه .

قال يوسف :

- وجهة نظرك تحترم .. هو حضرتك يا أستاذ وليد قولتلى
بتشتغل أيه ؟

قال وليد :

- مهندس .. هو حضرتك نسيت يا دكتور ؟

قال يوسف :

- لا منستش .. أنا بس بتأكد لالى شايفك بتتكلم بطريقة فيها
شوية فلسفة

ضحك وليد بقوة وقال :

- أحنأ شعب بنحب الفلسفة .. بنحب نتفلسف فى كل شئ

قال يوسف :

- طيب ايه رايك تكلمى باقى الحلم .. آخر حاجة قولتها لك
لمحت حاجة خرجت من الزرع وبعدين اختفت تلى فى لمح
البصر

تحول وجه وليد المبتسم الضاحك إلى وجه جامد ثم نظر إلى
الفراغ وقال :

- فضلت زي ما أنا ببص فى الشباك ومرة تاليه وفي جزء
الثانية كيان أسود خرج فجأة من ارض زراعية وطار فى

السما وبعدين نزل فوق القطر

- في الجزء من الثانية لمحت كل ده ؟

تحول وجه "وليد" الجامد إلى وجه مبتسم وكان بلاهة العالم
إصابته وقال :

- ما ده حلم بقى يا دكتور ؟

نظر له يوسف في صمت وقد استغرب ردود فعله التي تصيبه
من وقت لآخر وخاصة في ملامح وجهه ، أحيانا تصبح
طريقته في منتهى البلاهة وفجأة يصبح متزنا واثقا من
كلامه وفجأة يتحول إلى شخص غريب يتحدث بفلسفه
شديدة فدون داخل كرامته الصغيرة بضع الكلمات ثم قال :

- طيب لتفضل كمل كلامك ؟

- في الحلم صرخت وقلت لراجل كان قاعد جمبي أنت
شوفت اللي حصل ؟ فقال لي أنه مشفش أي حاجة ، فتحت
شباك القطر وبصيت وخرجت رأسي وبصيت لفوق ، فوق
سطح القطر ، ولمحت جزء منه ، وفجأة لاقيت وشه في وشه
كانت ملامحه مرعبة وسنانه حادة ولعابه السائل كان ييطير
وييجي على وشي بسبب الهواء وفجأة صرخ بصوت عالي

- حلم مرعب

- جداً يا دكتور.. تفاصيل الكائن ده أنا فاكرها كويس جداً
لكن مش قادر أوصفها لك

- طيب التفضل كمل

قال "وليد" وقد تملكه بعضاً من الخوف من تذكر الحلم :

- بعد ما صرخ في وشي دخلت راسي بسرعة من الشباك
واخذت شنطتي وقررت ابي انط من القطر ، لكن مجرد ما
خرجت من باب القطر لاقيت نفسي في المطار ، وفي واحدة
قاعدة جمبي في صالة الإنتظار وبتقولي أوعى تفكر أنك
هربت منه ، مفيش حد بيقدر يهرب منه ، بصتلها أوي كده
وقولتلها ألتى بتقولي آيه ، وسبتها ورحت شربت قهوة

قال "يوسف" في استغراب :

- تشرب قهوة ؟ في الحلم ؟

نظر له "وليد" وقد بدأت العصبية تظهر على ملامحه :

- ما أنا قولتلك يا دكتور أنه حلم ، ومن فضلك مش كل شوية
تقاطعني

اعتذر "يوسف" له وطلب منه أن يستمر في حديثه ، فشرب

وليد القليل من الماء من الكوب الموضوع بجوار العصير ثم
قال وهو ينظر في الفراغ متذكرا :

- في الحلم لاقيت نفسي راكب الطائرة وقاعد جيب الشباك
والطياره في السما وأنا بتفرج على شكل السما والوقت كان
ليل واحنا فوق السحب ، مشهد جميل جدا ، وبعد شويه
حببت اروح الحمام ، وأنا في طريقي للحمام الموجود في
الطيارة كنت ماشي في الممر وفجأة لاقيته اودامي
ثم نظر إلى "يوسف" وعلى وجه علامات الفزع :

- كان الكائن ده يا دكتور .. الكائن الغريب كان واقف في اخر
الممر وهو ببص لي بشرامه ، عيونه مربعه ، وكان باصلي
كأنه بيتأكد اني شوفته وفجأة وفي جزء من الثانية نط
وخرج من الشباك وبقي واقف على جناح الطائرة الغريب أنه
الازاز بتاع الشباك كان سليم مخلصهوش حاجه كأنه مر من
خلاله زي الهوا .. صرخت وقعدت اتنطط واقول للركاب اللي
معايا الحقوا شايفين الكائن ده ، النامس بقت تبص من الشباك
ومحدثش كان مصدق لأنهم مكنوش شايفينه زي ما أنا شايفه
محدثش كان مصدقني وجت المضيفه وهتني وقعدتني
مكالي وجابتلي شوية ميه علشان اهدا .

دون "يوسف" ما قاله "وليد" في كرامته ثم قال :

- حلم غريب وتفصيله كثيرة جدا

- انا عاوز أقولك انى مش ناسي اى حاجة من الحلم ده كلانى
عشته في الواقع قبل كده

- طيب لتفضل كمل

ابتلع "وليد" ريقه في صعوبه ثم مسح وجهه بيديه وبعدها
أخذ نفسا عميقا وبدأ يحكي وهو ينظر في الفراغ جامد
الملامح كعادته :

- بعد ما المضيضة جابلي كوب المياه وشربته قعدت شويه
أقنع نفسي أنه تخيلات أو هلاوس ، لكن وأنا ببص تلى من
الشباك لمحته من الشباك

ثم نظر إلى "يوسف" وقال صارخا :

- تلى يا دكتور ، شوفته تلى والناس مكتتش مصدقلى لما
حذرتهم اول مرة

وقف "يوسف" وهو يريت على كف 'وليد' مهتلا وهو يقول :

- أهدي يا بشمهندس .. أهدي كده .. متنساش أنك بتحكي
حلم

ثم ناوله كوب الماء ليشرب قليلا وبعد أن رشف رشفات
سريعه من الماء قال "وليد" وهو يحاول أن يكون هادئا :

- مش ناسي يا دكتور .. لكن الحلم ده يا دكتور كأنه كان
حقيقه أنا فاكرك كل تفصيله حصلت فيه وكأنها اتنقشت جوا
عقلي

قال "يوسف" :

- الأحلام ليها فلسفتها الخاصة والمعقدة محدش يقدر يفهمها
وحتى اللى حاولوا يفسروا الأحلام كل واحد كان له وجه نظر
مختلفة عن التانى لأنه فسرها حسب اعتقاده ، يعنى في اللى
فسرها دينيا وفي اللى فسرها فلسفيا وفي اللى فسرها طبيا
لكن في النهاية تفضل الأحلام والكوابيس كمان ليهم
فلسفتهم الخاصة وكل اللى بتقدر نعمله في الآخر لما بنصحى
من النوم أننا نقول اللهم اجعله خير .

قال "وليد" في هدوء :

- ونعم بالله يا دكتور .. عندك حق

قال "يوسف" :

- طيب ممكن تكملني ايه اللى حصل في الحلم

قال "وليد":

- لما بصيت من الشباك لتانى مرة هوفته تالى بس المرة دي
كان طائر وكان قريب جداً من الجناح ، بصتله أوي وأنا
بحاول أصرخ ، لكن صوتي مكنش عاوز يطلع ، كأن في حد
كلم صوتي ، أو مكلم بوقي ، وبعدها الكائن ده بكل قوته
ضرب نفسه في مراوح الطائرة اللى موجودة في الجناح اللى
بعد لحظات قليلة جداً انفجرت ، وبعدها أقوم مفزوع من
لومي وجسمي كله عرقان .

الطائرة

الاحد 19 نوفمبر

الساعة 11:23 صباحا

نظر يوسف إلى ساعته ثم إلى الساعي الذي كان يضع فنجان من القهوة أمامه بعد أن وضع فنجان آخر من القهوة أمام "وليد" ثم استأذن وانصرف في هدوء ... فارتشف وليد القليل من القهوة ثم أخذ يفتش في جيوبه عن شيء ما ثم نظر إلى يوسف وقال :

- ممكن استأذنك في سيجارة يا دكتور

ابتسم له يوسف ثم أخرج علبة السجائر والقداحة من حقيبته الجلدية وأعطاهم الي وليد الذي أخذهم وأخرج سيجارة ثم أشعلها ثم قال ليوسف :

- ألف شكر يا دكتور .. هو ميعاد سيجارتك مجاش لسا ؟

هز يوسف رأسه مؤكدا على كلامه وقال :

- لسا ...

ثم ارتشف القليل من القهوة وبعدها امسك قلمه وقال :

- وبعدين يا بشمهندس وليد ؟ ايه اللي حصل بعد ما صحيت من النوم ؟

سحب وليد نفسا من سيجارته ثم قال :

- صحيت مفزوع من النوم واقعدت اتشاهد واستغفر ربنا في سري وأنا حاطط أيدي على صدري .. كان قلبي بيدق جامد وكأنه هيخرج من صدري وبصيت في ساعتى لاقتها الساعة واحدة بالليل وأنا كان ميعاد طيارتي الساعة تماليه يعنى كان قودامى وقت كويس جدا أجهز فيه نفسى علشان الحق طيارتي ولبست وجهزت نفسى ونزلت من الشقة وطبعا منستش اخبط على البواب وأعرفه الى مسافر كام يوم ووصيته أنه ياخذ باله من شقتى وأنا بحطله قرشين في ايده وخرجت من العمارة وركبت عربيتى ...

قال "يوسف" مقاطعا حديث "وليد" وقال :

- ثانيه واحدة يا بشمهندس .. هو انت كنت مقرر تسافر من محافظتك لحد المطار بعربيتك ؟

قال وليد :

- أيوة يا دكتور كنت مقرر كده من وقت ما حجزت تذكرة

الطيران كمان ووصيت بنت خالتي اللى عايشه هناك قريب
من المطار أنها تقابلني في المطار علشان تأخذ مني العربية
تخليها عندها في جراج العمارة اللى ساكنه فيها علشان تكون
في امان بدل ما تسرق أو المرور يسحبها .

قال يوسف متسللا :

- سؤال فضولي شوية ؟ اشمعنى بنت خالتك ؟ كان ممكن
اخوك أو حد من قراييك ييجي معاك بعرييتك لحد المطار
وبعدين يرجع بيها وياخد بالها منها لحد ما ترجع بالسلامة .

وضع وليد سيجارته المشتعلة على ممحاة السجائر ثم أمسك
كوب القهوة وأرتشف منه البعض القليل الباقي في الضجان
ثم وضعه ونظر إلى يوسف وقال :

- لأن ببساطة يا دكتور أنا وحيد ابويا وامى .. مليش اخوات
وكمان ملناش قرايب في المحافظة اللى احنا عايشين فيها
وبعدين بنت خالتي وجوزها بثق فيهم جدا وكمان احنا
متربيين مع بعض من واحنا صغيرين يعنى زي الاخوات
بالظبط

قال "يوسف" في تساؤل :

- ماشي .. بس انت مش شايف إن مسألة سفرك بعرييتك

بيهدم نظرية الحلم بتاعك أو بيهدم نص الحلم على الأقل
لأنك جيت المطار بالعربية مش بالقطر ؟

قال "وليد" وهو ينظر في عينيه بغموض :

- بس أنا محكتكش لسا ايه اللي حصل معيا في الطريق وأنا
مسافر بالعربية

امسك "يوسف" بالقلم وكراسته ونظر إلى "وليد" وقال :

- وأنا كلي أذان صاغية

نظر "وليد" إلى الفراغ وقال :

- كانت الساعة بقت حوالي تلاته وأنا على الطريق الزراعي
وبعد كده طلعت موبيلي من جيبي ووصلته بالاستريو بتاع
العربية وشغلت أغاني نجاة الصغيرة .. أصل أنا من عشاق
نجاة الصغيرة يا دكتور وبالذات أغنية القريب منك بعيد
والبعيد عنك قريب كل ده وقلبي اللي حبك لسا بيسميك
حبيب ، أكيد انت عارف الأغنية دي يا دكتور .. المهم وأنا
سابق عربيتي فضل الحلم ييجي في خيالي وكل هوية أقعد
استعيز بالله من الرجيم وأرجع تاني أشغل عقلي بصوت نجاة
الصغيرة وبتندن معاها في هجن وفجأة لمعت حاجة جرت
قودام عربيتي ... دوست فرامل جامد ووقفت بالعربية

وسمعت واحد من عربيه تانيه بيشتمنى وهو بيقول "يا حمار
يا بن الـ.." طبعا انا مشغلتنش عقلي بيه .. اصل اللى انا لمحت
مكتش وهم يا دكتور ، أنا واثق اني لمحت حاجة عدت من
قودام عربيتي بسرعة.

قال "يوسف" :

- خرينا نقول انك مكتش نايم كويس وكمان الطريق كان
ضلمة وأكيد مع الضلمة وكمان إضاءة العربيات اللى رايعه
واللى جاية ممكن تخلق خيالات وضل يخليك تعتقد أن في
حاجة عدت من قودام عربيتك

قال "وليد" في ثقة :

- أنا واثق يا دكتور من كلامي وواثق أكثر من اللى شوفته
أنا مش أول مرة أسافر أو أسوق عربيتي في ظروف زي دي
قال "يوسف" :

- طيب يا بشمهندس .. ايه اللى حصل بعد كده ؟

قال "وليد" :

- ركنت عربيتي ونزلت أهوف ايه اللى عدا من قودامي .. أنا
مبحش اسبب التخيلات والتهبؤات تلعب في دماغي بحب

أواجه حتى ولو عارف انى ممكن أخسر وقتى على شويه
تهيؤات لكن المهم عندي انى اكون متأكد من سلامة عقلي.
قال يوسف :

- ماشي .. وبعدين ؟

- قعدت ابص في وسط الزرع يمين وشمال لكن كانت الدنيا
ضلمة فرجعت عربيتي واخذت موبيلي وفتحت الكشاف
بتاعه ورحت ادور وابص كويس في وسط الزرع .. وفجأة
لاقيت أيد حد على كتفي .. طبعا اتفزعت ونطيت من مكاني
فلاقيت راجل عجوز لابس جلابيه غامقه بيسألني انا بعمل
إيه هنا فملقتش حاجة أقولها له غير انى مسافر وركنت
عربيتي علشان أعمل زي الناس ومحفظتى وقعت منى
فبشوفها وخلاص لاقيتها .. الراجل ابتسملي كده وأنا موجه
ضوء الكشاف نحيتة وقالى طيب يا بنى بلاش تبقى بعيد عن
الطريق وعربيتك لأن المكان ده مليان بتعالب سمرانه ممكن
تأذيني فشكرته ورجعت عربيتي وكنت متأكد أن اللى عدى
من قودامى في لمح البصر مكتش تخيلات ده كان تعلب.

قال "يوسف" مبتسم :

- عجبتنى وجهة نظرك بتاعت أن مش كل حاجة نلمحها في

لحظات سريعة نرميها في سلة التهيات.

- أكيد يا دكتور أصل مش معقول أن في كون ماشي بنظام دقيق وبمنطق ممتاز تحصل فيه حاجات بس سرعة حدوثها كانت فوق قوة استيعاب العقل البشري فنيجي إحنا بقى نرميها على التهيات.

قال "يوسف":

- وبعدين ايه اللي حصل ؟

قال "وليد":

- ركبت عربيتي وشغلت نجاة الصغيرة تانى لكن كانت في حاجة في عقلي بتقولي انى شوفت الراجل العجوز اللي قابلنى في الطريق ده قبل كده ، ومش عارف ليه عقلي ريطه ببواب عمارتى أصله دايمًا بيحب يجمع بوابين المنطقة كل خميس قودام العمارة عندنا ويتعشوا سوا كنوع من الود والقرب.

قال "يوسف" مازحا :

- إحنا كده دخلنا على فيلم (البيه البواب) بتاع الأستاذ أحمد زكي.

ضحك "وليد" وقال :

- هو متقمص جزء من الشخصية دي .

قال "يوسف" :

- طيب في حاجة حصلت لما وصلت المطار ؟

قال "وليد" :

- بس أنا لسا محكتكش ايه اللى حصل معايا في الطريق.

قال "يوسف" في تساؤل :

- هو لسا في أحداث حصلت ؟

- طبعا يا دكتور حاجات كتير وبغض النظر على انى كنت
هعمل حادثتين وأنا سايق عربيتي ، وبغض النظر ان ازاز
العربية من ورا يجيليه سرطان ويقع متكسر زي حبات الرز
ودول من الحاجات الطبيعية اللى ممكن تحصل لاي حد ، لكن
الشي اللى مش طبيعي انك تخبط ديب على الطريق الزراعي
بعربيتك وفجأة تلاقى جماعته كلها جايه تهجم عليك وانت
جوا عربيتك واللى يشتمت عقلك اكثر ان العربية الجديدة
واللى مبقلاهاش شهرين عندي تتعطل في وقت هجوم جماعة
الديابة دي عليا بالرغم ان خبطتى للديب مسبيتش اي ضرر

في العربية غير أن الفانوس بس انكسر وبعد ما كنت هموت
من الرعب بسبب الديابة دارت العربية أخيراً.

نظر له "يوسف" في الدهاش وقال :

- آيه النحاس ده كله ؟

قال "وليد" :

- أنا مش مؤمن بحاجة اسمها لحس يا دكتور .. في حكاية
قريتها قبل كده بتقول أن في ملك قديم كان خارج يصطاد
وهو في الطريق وراكب عربيته الخشبية تتكسر فجأة عجلة
من عجالاتها ولما ينزل الملك من عربيته وحواليه حرامه
يلاقوا واحد شحات هدومه مقطعه ومنظره متبهدل ماشي
قريب منهم فتشالم منه الملك وأمر بحبسه وهوب الحراس
مكذبوه خبر واخدوه رموه في السجن ولما غيروا العجلة
المكسورة بعجلة تالية سليمة كمل الملك رحلته ورجع بصيد
ثمين وكثير فقرر لما رجع أنه يكافئ الشحات ويعطف عليه
ويراضيه ولما خرج الشحات وقابل الملك قال للملك يا مولاي
انت لما شوفتنى وعجلة عربيتك الخشبية مكسورة افكرت
اني انا نحس عليك بالرغم لك رجعت بغنيمة كثيرة من رحلة
صيدك وانا لما قابلتك بالرغم انى كنت ماشي في حالي بدور
على لقمة اكلها لتسجنت فياترى يا حضرة الملك مين فينا كان

النحاس على التانى ؟ الى التظلم واتسجن مع أنه معملش
حاجة ولا الملك الى اتكسرت عريته الخشبيه وكالت قضاء
وقدر ؟

قال "يوسف" :

- معاك حق يا بشمهندس (وليد) مش كل حاجة لرميها على
النحاس والتشاوم (ابراهيم) ابن الرسول (محمد) عليه افضل
الصلاه والسلام لما مات حصل خسوف للشمس فالناس وقتها
اعتقدت أن الشمس حزينه على وفاة (ابراهيم) ولما وصل
الى حصل للرسول (محمد) صلى الله عليه وسلم زعل جدا
وغضب وخرج للناس وقالهم : { إن الشمس والقمر آيتان من
آيات الله ، وهما لا تكسفان لموت أحد أو حياته } .

قال "وليد" :

- ساعات قوانين الصدفه بتلعب دورها .. لكن خلينا نقول إن
الى حصل معايا طول الطريق كالت كلها مجرد رسائل
وتحذيرات الى مسافره والفي الرحلة وأرجع شقتي تانى.

قال "يوسف" :

- طيب وليه مرجعتش ؟

قال "وليد" :

- الفضول يا دكتور .. الفضول اللى دايمًا بيخليك عاوز تعرف
ايه اللى هيحصل بعد كده .. يمكن ده كله يكون صدفة وأن
الحلم اللى شوفته كان مجرد كابوس لأن مش من حقي أحكم
على شئ لسا محصلش.

قال "يوسف" :

- وايه اللى حصل بعد كده ؟

نظر "وليد" إلى سيجارته اللى نساها مشتعله على ممحاه
السجائر فوجد أن النيران قد التهمتھا تمامًا فمد يده وأخرج
سيجارة من علبة السجائر الخاصة بالطبيب "يوسف" بعد أن
استأذن منه واشعلها ثم قال :

- وصلت المطار على الساعة ثلاثة ونص تقريبا واتصلت ببنت
خالتي فقالت أنها بعثت جوزها علشان ابنها تعبان ومتقدرش
تسييه أو تجيبه معاها فشكرتها واتمنيت الشفا لابنها واتصلت
بجوزها اللى لاقيته فعلا منتظرلى وسلم عليا واخد عرييتي
ولاحظ طبعا كسرة الفلاوس ومنساش يسألنى فقولتله لى
خبطت كلب مريتش طبعا اقوله التفاصيل كامله .. وبعد ما
ودعني وطبعا منساش يطلب علبة الشيكولاته اللى بجبهاهم

كل مرة بسافر فيها لألمانيا ...

فقاطعه "يوسف" وقال :

- لحظة واحدة يا بشمهندس وليد .. هو أنت متعود تسافر ألمانيا في كل إجازة.

هز وليد رأسه وهو يسحب نفسا من سيجارته دلاله على كلمة (نعم) فأستكمل "يوسف" سؤاله وقال :

- يعنى دي مش أول رحلة طيران ليك ؟

قال "وليد" بعد أن وضع سيجارته على ممحاة السجائر :

- أنا مقولتش أن دي أول مرة اسافر بالطيارة

قال "يوسف" :

- أنا كان متهيألي أن دي أول رحلة طيران ليك

اقترب "وليد" برأسه من "يوسف" وقال بنظرات ثابتة :

- متمشيش ورا تهيؤاتك كثير يا دكتور لازم تسأل وتتاكد.

ارتجف "يوسف" من داخله وشعر أن دوره كطبيب نفسي قد ينهار فليس من المفترض أن يقدم المريض نصيحة إلى طبيبه بل على العكس وخاصة أن جميع اقوال وليد وأسلوب حديثه منطقيه تماما حتى في نظرياته (التي تقنعك بالرغم

من اختلاف وجهه نظرك) فيها بأن هذا الشخص متزن وعقله منظم ومرتب بغض النظر عن تصرفات وتغيرات ملامح وجهه بين الحين والآخر .

كان يوسف يشعر بأنه أمام حالة شاذة .. حالة لم تصنف من قبل ولم يقابلها في حياته من قبل والغريب في الأمر والاكثر قلقا بأن شعر يديه تنتصب بين الحين والآخر حينما ينظر إلى وليد ويجده ينظر بجانب فمه الأيسر .. وهنا فاق من شروده حينما سمع "وليد" يقول إليه :

- آيه يا دكتور روحت مني فين ؟

نظر إليه "يوسف" ثم قال وهو يللم شتات عقله :

- آحنا وصلنا لحد فين يا بشمهندس ؟

قال "وليد" :

- لحد ما وصلت المطار وجوز بنت خالتي آخذ مني العربية

امسك "يوسف" بالقلم وكراسته الصغيرة ثم سأل "وليد" :

- وآيه ألى حصل بعد كده ؟

قال "وليد" وهو ينظر في الفراغ مثل كل مرة :

- دخلت المطار وكانت الساعة وصلت أربعة وعشر دقائق

وقعت في صالة الانتظار مستنى ميعاد طيارتي.

قال "يوسف":

- وهل في حاجة حصلت زي ما حلمت ؟

قال "وليد":

- بالعكس الدنيا كانت هادية ومفيش اي حاجة حصلت خلال فترة انتظاري ده كمان كان في ولد وبنت منهم قريب من بعض كانوا تقريبا اخوات توأم وكانوا بيعجوا يهزروا معايا ويلعبوا وده كان كفيف بالتفول.

- اكيد .. الاطفال ملايكة متجسدة ماشية على الأرض.

قال "وليد":

- بس في جملة بتقول تلى الريح بما لا تشتهي السفن لأن وأنا واقف في الطابور بتاع الجوازات كانت قودامى مت عجوزه واقفة قودامى ومجرد ما وصلت للشباك وختمت الجواز بتاعها بصلي وكانت بصتها ليا كفيه اني انهار عصبيا تماما

قال "يوسف" متلهفا :

- ليه ؟ ايه اللي حصل ؟

- لان دي الست اللي انا شوفتها في الحلم.

قال "يوسف":

- تقصد ايه ؟

- أقصد أن دي الست اللي كالت بتبكي في القطر جمبي وبالرغم اني مكنتش شوفت ملامح وشها في الحلم لكن أنا متأكد أنها هي لان لبسها وحتى تسريحة شعرها ولونه الابيض بيقلوا أنها هي.

قال "يوسف":

- ممكن ده يكون من تأثير الحلم على تركيزك فخلق جوا دماغك أن الست دي هي اللي شوفتها في الحلم ومتناسا انك في الحلم اساسا مشوفتش وشها يعني كل اللي بتوصفه من لبس أو تسريحة شعر ممكن يكون حالة تشابه ، المصنع اللي عمل الفستان ده عمل 100 غيره والشعر الابيض موجود عند أي حد عمره وصل لمرحلة العجز وكمان التسريحة مش دليل على أنها هي.

قال "وليد":

- ماشي همشي على نظريتك دي .. طيب والراجل اللي قابلته

في الطريق الزراعي ؟

قال "يوسف" في تذمر :

- ماله ؟

قال "وليد" :

- لما شوفت الست العجوزة دي عقلي نبت نبتة فيه وأتذكر
أن الراجل العجوز ده واللى مخي وقتها ربطه بالبواب بتاع
عمارتي وأنه شبه واحد من البوابين اللى بيعجوا كل خميس
يسهرُوا معاه

قال "يوسف" متسللا في حيرة :

- أيوة معناه ايه الكلام ده ايه ؟

قال "وليد" :

- يا دكتور الراجل العجوز ده هو اللى أنا شوفته في الحلم
وحضني وأنا في القطر

هرش "يوسف" أربية أنفه مفكرا ثم قال :

- ممكن دي تكون حالة من حالات ديجا.....

قال "وليد" مقاطعا حديثه :

- مش ديجافو .. ولا اي حالة من حالاتها .. أمستحالة اكون
فاكر تفاصيل الحلم كلها بكل دقة واجى عند الراجل العجور
مخي يخلق حاله خياليه الى شوفت الراجل ده قبل كده ، هو
ده الراجل الى انا شوفته في الحلم يا دكتور .. انا متأكد .

شعر "يوسف" بأنه يتهاوى أمام هذه الشخصية الغريبة من
نوعها فهو رجل يدرك كل الامور ، فقال له وليد استكمالا على
حديثه :

- وبعدين يا دكتور خلىنا نمشي على نظريتك بأن الست
العجوزة ممكن يكون اللبس وتسريحة الشعر فيها تشابه وأن
الراجل العجوز كان حالة من حالات ديجافو .. طيب وايه
رايك بقى في الى قعدت جمبي في الطائرة ؟

قال "يوسف" في تساؤل :

- مين دي ؟

اقترب "وليد" من "يوسف" وقال له بطريقة مرعبة :

- الى شوفتها في الحلم وكالت قاعدة جمبي في صالة
الانتظار وقالتلى اوعى تكون افكرت انك هريت منه ومسيبتها
روحت شربت قهوة.

قال "يوسف" وقد بدأ عليه تشتت الإنتباه وعدم الفهم :

- مالها ؟

قال "وليد" بتذمر وبشئ من العصبية :

- مالها ايه يا دكتور ؟ ما دي إالى طلعت قاعدة جمبي لما طلعت ركبت في الطائرة .. وكنت بتبسم ليا وكأنها تعرفني من سنين ومتقولش أنها ممكن كانت معجبة بيا.

نظر له "يوسف" ببلاهة ثم استعاد لتزائه وقال :

- لا مش هقول كده .. بس ممكن تحكي لي ايه إالى حصل بعد كده ؟

قال "وليد" :

- طبعا الموضوع كان وصل معايا لذروته وكنت واثق وعارف ايه إالى هيجصل بعد كده .. فاضل انى أروح الحمام علشان تكون دي أول مواجهة حقيقية بيني وبين الكلن الغريب ده .. الشئ إالى بيتريصلي من ساعة ما نزلت من شفتى لحد ما ركبت الطائرة .. الطائرة يا دكتور إالى كانت فخ أتنصب ليا كويس علشان أموت موته مرعبة .. الموت الأسود يا دكتور إالى بتطلع منه جنتك محروقه أو أهلام .. الموت إالى مفيش

بني آدم يتمنى يموتها.

قال "يوسف" :

- ربنا ما يكتبها على حد.

قال "وليد" :

- الغريبة فعلا لى اتزنت وكنت عاوز أدخل الحمام .. لكن كنت خايف للى عارف ايه اللى هيحصل بعدها .. حاولت امسك نفسي لكن مقدرتش وبذل ما اقوم علشان ادخل الحمام لاقيت نفسي قايم وعاز انزل من الطائرة .. المضيقة حاولت تمنعنى لكنى كنت مصمم وقعدت ازعق واصرخ واحذر الناس انها هتموت لكن للأسف محدش كان بيسمعلى لاتهم كانوا معتقدين انى مجنون وبعد فترة اخيرا قرر الطيار لى انزل من الطائرة للى هسبب حالة هلع فى الطائرة والركاب ولاقيت فردين شرطة جم اخدوني وادينى قاعد قودامك .

التهى "يوسف" من تدوين ملاحظاته داخل كراسه الصغيرة وهو يقول :

- كنت متأكد ان مفيش كائن ه يظهر لك لأنه لو كان عاوز يظهر لك كان ظهر لك من البدايه.

- يعنى ايه يا دكتور ؟

- يعنى خلىنا نقول انك حلمت بكابوس مرعب ... كابوس دخلك جوا متاهة أو هام وخلق تهيؤات معاك استخدم فيها قوانين الصدفة اللى حصلت معاك زى الحوادث اللى حصلت معاك فى الطريق .

قال "وليد" :

- همشي على نظريتك يا دكتور ، طيب وايه رايك فى الشخصيات اللى قابلتها ؟

قال "يوسف" :

- مش من العدل أن احنا نحكم على شخصيات من أول مرة نشوفها فى حياتنا عقولنا ساعات بتخلق أحداث وشخصيات بسبب ضغوط عصبية وانت كنت مضغوط عصبيا بسبب الحلم أو الكابوس ده فقررت تحكم على الشخصيات دي أنهم هم اللى كانوا موجودين معاك فى الحلم.

نظر إليه "وليد" فى هدوء ولم ينطق بكلمة واحدة بل عاد إلى قلقه وأرهاقه الذي دخل بهما فى أول لقاءهما فقال "يوسف" :

- أنا هتكلم مع حضرة الضابط انك تمام ومفيش أي حاجة فيك بالعكس انت شخص عاقل ومتزن ومتقف كمان وده

تقديري من الجلسة الى قعداتها مع بعض لكن كل الى كنت فيه ده كان ضغط عصبي تعرضت له وده شئ طبيعي ممكن يحصل مع أي حد وانا واثق أنه هيفرج عنك بضمان محل إقامتك.

هز "وليد" رأسه في هدوء ومن الغريب أن حينما انتهت جلستهما دخل عسكري للغرفة كأنه يعلم بأن الجلسة انتهت وحن وقت أرجاع وليد إلى حجزه وبعد قليل دخل ضابط الشرطة وجلس على مكتبه فشرح له يوسف وضع وليد الصحي والنفسي والعقلي فتفهم الضابط الأمر وشكر يوسف في ود وحب ثم خرج يوسف من مكتب رئيس الأمن.

مار يوسف بضع خطوات ثم سمع رنين هاتفه المحمول فأخرجه من جيبه فوجد أنه المنبه وان الساعة أصبحت الواحدة بعد الظهر وان هذا ميعاد سيجارته فأغلق المنبه وأخذ يفتش في حقيبته الجلديه من علبة سجائره وقداحته فتذكر أنه تركهم في مكتب رئيس الأمن فعاد وطرق عدة طرقات ثم دخل فلم يجد أحدا في المكتب فشعر بالاستغراب أنه لم يبتعد عن المكتب سوا بضع خطوات قليلة فكيف خرج الضابط بهذه السرعة ؟ ، فأعتقد أنه خرج وراء منه يتفقد أحوال المطار أو أنه ينهي بعض الأوراق للإفراج عن وليد ، ثم

نظر إلى ممحاة السجلار فوجدتها فارغة تماما بل كالت نظيفة فاعتقد بأن الساعي أخذ المتسخة وترك ممحاة أخرى نظيفة خاصة أن الضابط شره في التدخين كما أخبره وليد ثم التفت يمينا وشمالا فلم يجد علبة سجلاره ، فظن أن الساعي قد أخذها أو أن وليد قد اعتقد أن علبة السجلار تركت له فأخذها كشى من الواجب.

لم يشغل عقله كثيرا بهذا فيكفيه ما قص له من حكاية وليد وقصته مع الحلم والتي لم تحدث في الواقع فخرج من المكتب ومار إلى الكافيتريا فوجد فتاة حسناء واقفه فطلب منها علبة سجلار وفنجان من القهوة وبعد أن أخذ طلباته ذهب وجلس على أبعاد منضدة في الكافيتريا وأخرج كرامته الصغيرة وأخذ يقرأ كل ما دونه من قصة وليد الغريبة .

أشعل سيجارته ومسحب نفسا عميقا منها كانه يريد أن ينعش صدره الذي اشتاق الى النيكوتين ثم امسك القلم وبدأ يكتب :
" من السن أن نحكم على الجميع أنهم مرضى وليس من العدل أن نحكم على الجميع بأنهم عاقلين فبين الجنون والتعقل شعرة صغيرة أن قطعت ضاع العقل بين الأوهام والحقائق فتصبح الحقيقة وهما ويصبح الوهم حقيقة "
ثم أخذ نفسا آخر من سيجارته وأرتشف رشفة من فنجان

قهوته ثم كتب :

" أن حالة اليوم لم استطع تصنيفها بل إنها لم تكن جلسة طبيب نفسي من الأماس ، لقد كانت نوعا من الحوار ، قصة قبل النوم استمع إليها وفي الحقيقة لقد قمت بتصديقها فقد كان أسلوب الراوي ممتعا بغض النظر عن تصرفاته لكن عقله المنظم اقنعني بأنها كانت حقيقية ، ولو كنت أشعر بأن حالة المريض نوع من أنواع الهذيان أو التخبط أو الاضطرابات العصبية لكنت ألقيتها أسرع من ذلك ولم أكن لأجلس مع وليد هذا لما يقارب الثلاث ساعات وهذا لم يحدث مع مريض قبل ذلك طوال فترة عملي فقد استطاع وليد هذا أن يجذبني بحديثه المنطقي من وجه نظره ولكن يبقى السؤال الوحيد ما هو تفسير هذا الحلم ؟ لو كان تفسيره دينيا فقد يقال بأن الشيطان يتلاعب بعقله وأن هؤلاء الشخصيات التي رآها هي في النهاية مجرد تحذيرات ربانية بأنه يجب عليه أن يعود إلى الله وأن ينفذ تعاليم دينه ... وإذا فسرناها فلسفيا فقد يكون هذا الرجل يشعر بأن هناك شخصيات تحمل له الضغينة والكراهية ويتمنوا له الموت بأبشع الطرق ، أما إذا فسرنا الأمر طبيا فقد يكون أنه بسبب إرهاق عصبي ونفسي زرع داخل عقله هذا الحلم ، أما إذا سألت أحد الأشخاص الذين تعودوا على المزاح فسوف يخبروك بأنه كان يجب عليه أن يضع

البطانيه جيداً عليه وهو نائم وان بالتأكيد كان هناك جزءاً
حساساً من جسده كان عارياً "

انتهى من سيجارته ثم اطفأها في ممحاة السجائر ورشف
آخر رشفة من فنجان قهوته ثم أشار إلى الفتاة الواقفة تضع
طلبات إحدى الزبائن فجأت إليه وهي مبتسمة فسألها عن
الحساب وترك لها المبلغ المطلوب مع بقشيش محترم ثم نظر
في ساعته فوجد أنها قاربت على الثالثة فتناول في
خمول وقرر أنه حان موعد العودة إلى المنزل ثم النوم
العميق.

الموت الأسود

استيقظ "يوسف" من نومه صباحا وهو يشعر بأن هناك آلاما كثيرة في عظامه وكان هناك قطار مار فوق جسده ذهبيا وإيلبا عدة مرات فمن الطبيعي أن ينام الإنسان من ستة إلى ثمانية ساعات ولكن أن ينام من الساعة الرابعة عصرا بعد عودته من المطار إلى الساعة التاسعة صباحا في اليوم التالي فهذا ليس شئ طبيعي بالمرة ولكن هذا شئ يعود إلى إرهاق عقله والتفكير الكثير .

أشعل سيجارة فقد فات ميعاد سيجارته والتي كانت من المفترض أن تكون الساعة السابعة صباحا وهذا يعنى ترتيب جدول مجالره مره اخرى حسب عدد الساعات كما تعود .

دخل إلى شرفة منزله بعد أن قام بتحضير كوب من الشاي بالنعناع هذا الإجراء المتبع يوميا حينما يستيقظ ثم أمسك هاتفه فوجد بأن هناك أكثر من 20 مكالمه فلاته والتي لم يشعر بها من أثر النوم العميق فقرر أن يتجاهل تلك المكالمات وان يعاود الاتصال لاحقا ثم قام بفتح تطبيق الفيسبوك وأخذ يتصفح بعض من صفحات الفنانين والسياسيين ويقرأ

منشوراتهم دون أي تعليق منه ثم أخذ يتصفح صفحات الأخبار لمتابعة أحوال وأخبار العالم وأثناء تصفحه وجد عنوان لفت انتباهه كثيرا (تم التشال الصندوق الأسود للطائرة المحطمة) جلس معتدلا وأخذ يقرأ الخبر جيدا والذي وجد مكتوبا كالتالى :

"بعد مرور يومين على سقوط الطائرة رقم 752 والتي كانت متجه إلى ألمانيا والتي وقعت في البحر المتوسط بعد انقطاع الإرسال بها لمدة عشرون دقيقة قبل سقوطها امتطاع الغواصين والجهات المعنية المخصصة بالتحقيق التشال الصندوق الأسود ويقول الخبراء بأن بإيجاد هذا الصندوق فقد نستطيع حل لغز سبب سقوط الطائرة والأحداث التي جرت خلال فترة انقطاع الإرسال ، وقد تم أول أمس مساء نشر أسماء الركاب الذين كانوا على متن الطائرة المنكوبة .. لقراءة قائمة أسماء الركاب اضغط على هذا الرابط :

<https://facebook.com/hekayawakhbr/585339>

ومن فضلك لا تنسى التفاعل والتعليق لأن هذا يدعمنا على الاستمرار "

ضغط "يوسف" بأصابعه سريعا على الرابط لكن وجد أن

الرابط لا يعمل وأن هناك شيء خاطئ وهنا قدر أن يفعل الشيء الوحيد وهو الذهاب إلى المطار مرة أخرى.

أثناء سيره داخل طرقات المطار كان هناك شيء آخر يشغل تفكير "يوسف" ، لقد ذكر الخبر بأن الطائرة وقعت أول أمس وليس بالأمس فقد كان جالسا مع وليد بالأمس والذي تنبأ بسقوط الطائرة بسبب كائن غريب فهل هذا خطأ كتابي قام به مشرف صفحة الاخبار هذه ؟ أم أن تلك طائرة أخرى ليس لها علاقة بالطائرة التي كانت سوف يركبها وليد ؟ أن حل هذا اللغز سوف يكون بدايته في مكتب رئيس الأمن الموجود في المطار والذي استدعاه ليتفحص حاله وليد .

وعندما وصل إلى مكتب رئيس الأمن وجد عسكري واقفا أمام الباب فأخبره باسمه وطلب منه مقابلة الضابط المسؤول لأمر ضروري ، فدخل العسكري وبعد لحظات خرج وأخبره أن الضابط قد وافق على مقابلته ، وعندما دخل "يوسف" كانت هناك صدمة في انتظاره .

فلم يكن هذا هو الضابط الذي استقبله بالأمس ، أن الذي أمامه الآن كان طويلا عريض المنكبين لون شعره أسودا ناعم تتناثر فيه بعض الشعيرات القليلة البيضاء يقارب منه من الأربعين عاما تبدوا عليه علامات القوة والفراسة عكس الذي

قابلته بالأمس والذي كان قصير ومسمين واصلع الرأس ويقارب
منه الى الستين ، فجلس "يوسف" وهو ينظر الى الضابط في
توتر فقال له الضابط :

- أهلا وسهلا يا دكتور .. أقدر اعرف سبب مقابلةك ليا ؟

قال "يوسف" :

- في الحقيقة أنا جاي أسأل بخصوص الطائرة اللي وقعت
امبارح ؟

نظر له الضابط في تساؤل ثم قال :

- مفيش طيارات وقعت امبارح أكيد حضرتك تقصد اول
امبارح.

قال "يوسف" :

- لا يا فندم أنا بتكلم عن الطائرة اللي وقعت امبارح وكانت
رايحه ألمانيا

قال له الضابط في إصرار :

- ما أنا بقولك يا دكتور يوسف اهو أن مفيش طيارات وقعت
امبارح الطائرة اللي حضرتك بتكلم عنها دي وقعت اول
امبارح.

قال "يوسف" في حيرة :

- أنا مش فاهم حاجة .. طيب طيارة أمبارح اللي كانت رايحة
المانيا وصلت بسلام ؟

قال الضابط :

- بصراحة يا دكتور أنا مش فاهم حضرتك تقصد ايه ولا فاهم
اي حاجة بس خليني امشي معاك للنهاية وعلى العموم مكنش
في طيارات رايحه ألمانيا أمبارح ولا النهارده ولا حتى بكرة
لان دي بتبقى مواعيد غير ثابتة بسبب أحوال الطقس أو
خطوط سير الطيارات وحاجات تانية كتير معقدة.

قال "يوسف" بدهشة :

- ازاي يا فندم ؟ أنا كنت موجود هنا أمبارح بعد ما استدعاني
زميل حضرتك علشان أكشف على واحد كان عنده حالة
عصبية والحالة دي كانت المفروض تكون على الطائرة اللي
طالعه ألمانيا.

قال الضابط في تساؤل :

- أمبارح ؟ وزميل ليا ؟

قال "يوسف" :

- أيوة هو كان أكبر من حضرتك في السن وقصير ومليان
شويه وأصلع

قال الضابط :

- كانت الساعة كام ؟

قال "يوسف" :

- كنت هنا حوالي الساعة عشرة الصبح ومشيت من عنده
حوالي الساعة واحدة بعد الظهر

قال الضابط في هدوء محاولاً أن يتمالك اعصابه :

- بص بصراحة كده أنا لو مكتتش عارف أنك دكتور وراجل
محترم كنت أمرت بحبسك لأن اللي انت بتقوله ده كلام
مجانين لأن أولاً مفيش ضابط تاني مسؤول هنا في المطار
غيري .. ثانياً بقى مش من حق أي ضابط أن يستدعي طبيب
علشان يكشف على حاله ده إجراء لازم تاخذه النيابة ويكون
كمان النيابة هي اللي اختارت الطبيب ده يعني ده شئ مش
من صلاحيتنا.

قال "يوسف" في حيرة :

- بس أنا متأكد من اللي بقوله لحضرتك

قال الضابط :

- وأنا مقولتش لك مجنون فياريت لو سمحت لتجاوز الموضوع ده وتتفضل تمشي في هدوء بدل ما ألزلك الحجز

قال "يوسف" وهو يهم بالنهوض من الكرسي :

- سؤال اخير يا حضرة الضابط وهمشي بعدها

قال الضابط :

- اتفضل يا دكتور

- أكيد حضرتك لما بتعمل محضر لحد بيكون اسمه مكتوب في المحضر

هز الضابط رأسه موافقا على كلامه فأستكمل يوسف حديثه وقال :

- طيب ممكن حضرتك تسال على محضر باسم وليد سليمان البشبيشي ووظيفته مهندس هو كان من المفروض يكون على الطائرة دي

رفع الضابط سماعة الهاتف الارضي وسأل محدثه عن اسم "وليد" ثم اغلق الخط بعد أن وضع السماعة مرة أخرى وقال :

- مفيش محضر اتعمل لحد بالاسم ده

شكره "يوسف" وخرج من المكتب وعقله مشغول من كثرة التفكير فما يحدث الآن هو ضرب من الخيال وأن هناك شى غير منطقي وهنا مربجواره إحدى المضيفات فاقفها واخبرها بأنه يريد معرفة قائمة الأسماء التى كانت موجودة على الطائرة التى سقطت فأخبرته بأن تلك الطائرة كانت تابعة لمكتب طيران وأخبرته عن مكان هذا المكتب في المطار بعد أن وصفت له طريقة وصوله إليه .

وعند مكتب الطيران استلم "يوسف" ورقه بها قائمة الأسماء من إحدى الموظفات الجالسات وراء إحدى شاشات الكمبيوتر وأخذ يقرأ الأسماء وهو سائر بتركيز شديد والمدهش أن اسم وليد لم يكن ضمن قائمة الأسماء وهذا ما سبب له حيرة أكثر سار على قدميه حتى وصل إلى الكافيتريا الخاصة بالمطار ثم جلس على أقرب كرسي قابله وأخذ يقرأ قائمة الأسماء مرة أخرى فلم يجد اسم وليد ، ولكن كيف حدث هذا ؟

هل كانت شخصية "وليد" هذا لم تكن موجودة من الأساس هذا ما يؤكد الضابط المسؤول الذي قابلته للتو والذي أخبره بأنه ليس هناك ضابطا مسؤولا آخر غيره ، فإذا كان الضابط الذي استدعاه لاختبار حالة "وليد" هو في الأساس شخصية وهمية فبالتالى لم يكن وليد شخص حقيقي .

هنا اقترب منه النادل الشاب والذي سأله عما يشربه فنظر له يوسف وقد راق له فكرة قد تكون هي التأكيد الأخير لكشف ملابسات ما يحدث حوله ، فقال له :

- أنا عاوز فنجان قهوة وعلبة سجائر

فهزله النادل رأسه في ود وقبل أن ينصرف قال له يوسف :

- لو سمحت أمبارح أنا كنت هنا وطلبت شاي والأنسه اللي كانت هنا جابتلى قهوة بدل الشاي وكمان علبة السجائر مكنتش هي نفس النوع اللي أنا طلبتها ..

نظر له النادل الشاب في تساؤل وقال :

- آنسة ؟ آنسة مين ؟ احنا مفيش آنسات بتشتغل معنا

قال له يوسف :

- انت متأكد ؟

قال النادل وهو يبتسم :

- طبعا ياباشا متأكد .. كلام ما بيني ومابينك الكافيتريا دي ابويا وعمى ماجريتها شرك من وزارة السياحة ووردية الصبح بيبقى موجود فيها أنا وابويا بس ووردية الليل بيبقى موجود فيها عمي وأولاده الاتنين وكل أسبوع بتبدل الورادي ما بينا

ومابين عمي وكمان عمي معندهوش بنات اساما

ابتسم له "يوسف" ثم قال :

- أنا آسف يا بني معشي الظاهر اني اتلفطت في المكان بس
هو الموقف حصل معايا فعلا بس الظاهر زي ما قولتك حصل
في مكان تلى .. معشي ضغط الشغل بيخلي الواحد يسقط
حاجات كتيرة منه

ابتسم النادل وقال :

- الله يكون في العون يا باشا

فأخرج يوسف بضع الوريقات من العملة ثم لفها ووضعها في
يد النادل وشكره ثم هم بالانصراف ، نظر النادل إلى المال
الذي في يديه وقال :

- ده كتير اوي يا باشا

قال "يوسف" مغادرا :

- مفيش حاجة تكرر عليك

فقال النادل :

- طيب والطلبات ؟

لم يجيبه يوسف وقرر الذهاب وفي عقله سؤال واحد ..

"ما الذي يحدث ؟ "

دخل "يوسف" شقته وأول شيء فعله هو البحث عن كراسه الصغيرة فبالتركيز هناك شيء قاله وليد في حديثهما سويا قد يكون خيطا لكشف السر فيما يحدث معه الآن وحينما وجدها داخل حقيبته أخذها وجلس على الأريكة الموجودة في صالة شقته وأخذ يقلب أوراقها في سرعة لكن لم يجد شيء .

لم يجد أي شيء حرفيا ..

كانت كراسه الصغيرة جميع أوراقها فارغة تماما عدا جملة واحدة هو يتذكرها جيدا ولم يكتبها هو لأنها كتبت بخط منى للغاية .. خط يدل على من كتبه كانت يده ترتعش في خوف أو كتبت بيد من لم يعتاد على الكتابة .

كانت الجملة تقول " متمشيش ورا تهيؤاتك كثيرا دكتور لازم تسأل وتتأكد " أن تلك الجملة عقله يتذكرها جيدا لأن قائل تلك الجملة هو وليد نفسه .. وهنا بفراسه شديدة فهم يوسف معنى الرسالة فأخرج هاتفه ونظر إلى التاريخ فوجد مكتوبا (الثلاثاء / 21 نوفمبر / الساعة الثالثة عصرا) وهذا يعني شيء واحدا وهو أن هناك يوم مفقود فقد قابل وليد هذا

يوم الاحد ، واليوم هو الثلاثاء ، فماذا حدث يوم الاثنين ؟

نظر الى أعلى ركن في الصلاة ، وقد ثبتت في ثنيات عقله فكرة جديدة أن هذا الركن موجود به كاميرا مراقبة والذي قام بتكبيها بعد حادثة السرقة التي تعرضت له شقيقته منذ سنتين ، وعلى الفور احضر اللابتوب وقام بإيصال الأسلاك بها وقرر أن يشاهد تسجيلات الكاميرا منذ يوم الاحد وهنا بدأت الأمور تتضح له .

لقد كان جالسا يوم الأحد على الأريكة يتصفح هاتفه ويبدو أن هاتفه المحمول قد جاء به مكانه فوقف واقترب من زجاج شرفته ثم أجاب ووضع سماعة الهاتف على أذنه وبعد قليل وضع الهاتف في جيبه وظل واقفا أمام زجاج الشرفة ثابتا لا يتحرك .

مرت عشر دقائق في التسجيل ومازال "يوسف" واقفا مكانه ثابتا فأخذ يوسف يضغط على سرعة العرض الى $\times 2$ ولكن لم يحدث شيء فقد مر أكثر من ساعة على عداد الوقت الخاص بالتسجيل وكان يوسف مازال واقفا ثابتا في مكانه .

قام بزيادة السرعة الى $\times 4$ ولكنه يظهر "يوسف" في صورة العرض ثابتا كما هو بلا أي حركة ..

قام بزيادة السرعة إلى $x8$ ولكن كما هو الحال دون أي تغيير بالرغم من مرور 6 ساعات ..

قام بزيادة السرعة إلى $x16$ وهي آخر سرعة يستطيع جهاز التسجيل فعله وكان يظهر يوسف كما هو واقفا ثابتا بلا حراك انتهى يوم الأحد .. وجاء ليل الاثنين وكان واقفا ثابتا كما هو. ثم جاء صباح الاثنين وكان واقفا ثابتا كما هو الحال بلا حراك كان "يوسف" يشاهد ويراقب في تركيز شديد وتوتر وحيره من امره وهو ما أصاب قواه العصبية وهذا ما جعله يكسر قواعده ويشعل سيجارة في غير وقتها المعتاد الي أن جالت الساعة الرابعة على جهاز التسجيل.

وفي الساعة الرابعة الموافق يوم الاثنين الموافق 20 نوفمبر على شاشة التسجيل تحرك يوسف أخيرا بعد أن ظل واقفا ثابتا على قدمه لأكثر من 24 ساعة وبعد أن بدأ في التحرك أخرج هاتفه المحمول من جيبه وخلع حذائه ثم دخل الى غرفه نومه ولم يخرج منها سوى اليوم في الساعة التاسعة صباحا وهذا ما يفسر سبب آلام جسده .

ولكن ما الذي سبب له تلك الحالة التي إصابته ؟ من الذي قام بمحادثته على الهاتف وماذا قال له ؟

كانت هناك الكثير من التساؤلات تدور داخل عقله ولكنه لم يجد أجابه واضحة لها وبالرغم من هذا استطاع أن يحافظ على سلامة قواه العقلية وأن يعيد ترتيب الأمور والتفكير بعقل متزن هادئ وعندما أغلق اللابتوب وفك جميع الأسلاك منه وقام بإيصالها في أوضاعها الصحيحة في جهاز التسجيل حمل اللابتوب ووقف ليذهب إلى غرفة نومه.

ولكن فجأة سقط اللابتوب من يديه ..

فلقد كان واقفا هناك ...

كلان غريب مخيف ينظر له بعيون دمويتين يتطاير منهما الشر والغضب .. وكان واقفا أمامه مباشرة ويوسف يرتعد من الرعب .. وداخل ثنيات عقل يوسف بدأت تظهر أصوات طبل .. وبدأ صوت غريب يقول داخل عقله:

كلوا اثني عشر مختارا

مقطوا من النجم المذهب

كلوا اثني عشر محارب

لم يرهبهم نارا أو لهب

كلوا اثني عشر فارس

لم يطمعوا في ماس أو ذهب

كانوا اثني عشر

سقط واحدا وانت التالي والثالث قد ذهب

وهنا شعر "يوسف" بالهم فطبع في كف يده اليسرى ..

مسك "يوسف" يده اليسرى باليمين وهو يصرخ كأن هناك نارا
تحرق يده وبدأت تظهر على كف يده دائرة داخلها رقم 2
وكأنها ختمت بختم من نار ووصم بها إلى أن يفنى جسده.

وقع "يوسف" على الأرض من شدة الألم وهو يمسك يده
ويصرخ عاليا باكيا .. هنا اقترب منه الكائن ثم حمله بقوة
والقاءه بالقرب من باب الشرفة الزجاجية ، فتأوه "يوسف" من
أثر السقطه وهو مازال ممسكا بيده في ألم ، وهنا سمع صوت
داخل عقله يقول بصوت مرعب :

- قم أيها المختار ولبي دعوة اختيارك

نظر "يوسف" إلى الكائن وقال :

- أنت ايه وعاوز مني ايه سبني في حالي

نظر له الكائن وأشار إلى الشرفة ثم سمع صوته مرة أخرى
داخل ثنيات عقله :

- قم ولبي لداء الدعوة ولا تجعل من موتك هباءاً فأنت هنا لا تملك حق الاختيار.

قال "يوسف" في إرهاب :

- أنت عاوزنى ارمي نفسي ؟ ليه ؟ علشانك ؟ انت ولا حاجة ولا تقدر تعمل معايا حاجة ، الموت والحياة حاجة يملكها ربنا وانت مش من حقت تقرر مصيري

صرخ الكائن الغريب في قوه وغضب ثم حمل "يوسف" بيد واحده ثم القاه في اتجاه الشرفه فكسر زجاج باب الشرفه وخرج جسد "يوسف" وأصبح في الشرفه ثم سمع "يوسف" صوت هذا الكائن في ثنات عقله يقول :

- انا استطيع ان اقنعك بالقاء نفسك

وهنا شعر "يوسف" بألم فظيع في ظهره كأنه قد نام على جمرات من نار .. وأخذ يوسف يصرخ صرخات عاليه .

صرخات تمزق الأذان ..

صرخات تدل على قوة الألم التى يشعر بها يوسف ..

قوة ألم واحتراق شديدين جعلته يقف على قدميه في إرهاب ثم أمسك جدران الشرفه بيد مرتعشة ليلقي بنفسه في الهواء

ليسقط من الدور الخامس صريعا ملقى على الأرض وعلى وجه علامات الفزع والألم الشديد .

وبداخل شقته كان قد اختفى الكائن الغريب تماما ..

وهناك على المنضدة الخشبية الصغيرة الموجودة في صالة الشقة كانت عليها الورقة التي تحمل أسماء الركاب الذين كانوا على متن الطائرة المنكوبة وأسفل آخر اسم في القائمة بدأت تظهر نقاط سوداء صغيرة .

ثم تشكلت إلى أشكال صغيرة ..

ثم بدأت تتشكل الى حروف ..

ثم بدأت الحروف تتشابه ..

ثم ظهر الاسم كاملا ..

" وليد سليمان البشبيشي "

**** تمت بحمد الله ****

تعقيب صغير

حالة الديجافو دي حالة يتها فيها للشخص أنه اكرر معاه حدوث موقف أو أنه شاف مشهد معين قبل كده أو أنه حس بأنه قد شاف قبل كده مكان بالرغم أنه بيزوره لأول مرة.

طيب ايه هو تفسير ظاهرة الديجافو ؟ خلىنى اقولك أن تفسير الظاهرة دي ليها بعض الفرضيات :

علماء أو باحثين أو كُتاب ما وراء الطبيعة بيعتقدوا أن ظاهرة الديجافو بتتعلق بخبرة حياتية ماضية عشناها قبل ما نيجي للدنيا في اشكالنا الحالية وهم اعتقدوا أن ظاهرة الديجافو تشبه كثير لظاهرة تليه تعرف بتجربة ما قبل الولادة BBE.

المحللون النفسيون بقى شايفين أن الديجافو تعتبر تعبير عن رغبة قوية لتكرار تجربة ماضية، والأطباء بيفسروها على أنها حدوث عدم مطابقة Mismatching في الدماغ بيتسبب في جعل الدماغ يخلط بين الإحساس بالحاضر والماضي.

لكن على كل حال ظاهرة ديغافو ممكن نفسرها بشكل عام أن في عدم توافق زمني في تسجيل الأحداث في نصفي الدماغ الأيمن والأيسر

وخلىنى برضه أوضح نقطة أن ظاهرة الديجافو ظاهرة

نفسية بديهية أو حتمية شائعة بتحصيل لكثير منا ومنتشرة
نسبياً بين الذكور والإناث على حد سواء وبالرغم من كده
مفيش دليل قاطع على مدى شيوع ظاهرة ديجافو على أرض
الواقع في تقديرات مختلفة بتقول أن ما بين 60 الى 80 %
من سكان العالم بيعانوا من ظاهرة ديجافو

من مقال تم كتابته من قبل

على صفحتي الشخصية على الفيسبوك

أحمد عبد الحميد

أعمال أخرى للكاتب

- رواية لعنة الزمردة أسرار الثعلب
- رواية لعنة الزمردة 2 البداية
- رواية لعنة الزمردة 3 القربان
- رواية لعنة الزمردة 4 برديات أوزاريس (تحت الكتابة)
- رواية الموت الأسود
- كتاب الحشاشين
- رواية نباش المقابر
- رواية تعويذة الحياة
- كتاب أساطير وحكايات (تحت الكتابة)



كانوا اثني عشر مختارا
سقطوا من النجم المذهب
كانوا اثني عشر محارب
لم يرهيبهم نارا أو لهب
كانوا اثني عشر فارس
لم يطمعوا في ماس أو ذهب
كانوا اثني عشر
سقط واحدا وانت التالي والثالث قد ذهب

الموت الأسود

BLACK DEATH

أحمد عبد الحميد